



M Soab a Wēnde maneg m dīinā n kō-ma, sēn yaa mam yellā gūudmā

Yii Abu Hurayrat nengē (Wēnd yard be a yīnga) a yeelame: Wēnd Tēn-tuuma (Wēnd puusg la A tigr be a yīnga) rag n yume n yetē: «M Soab a Wēnde maneg m dīinā n kō-ma, sēn yaa mam yellā gūudmā, la F maneg m dūni wā n kō-ma sēn yaa mam vumā sēn be a pugē wā, la F maneg m laahrā n kō-ma, sēn yaa mam lebengā sēn togdē wā, la F maan vumā ti yaa paasg ne-ma sōma fāa pugē, la F maan kūumā ti yaa vuusg ne maam n yi wēng buudā fāa».

[Naṣun Ṣahuḥun (Gom-sikdem sēn manege)] [A Muslim n togs-a]

Nabiyaamā (Wēnd puusg la A tigr be a yīnga) a kosa kosgo, n tigim a pugē, zug sōmsā yēgā b sēn tums-a t'a wa pidsā, bāmb me la dīinā la dūni wā la laahrā manegre, rēnd a tūusa gom-bi-kāensā sēn yaa koεgā, yel-kāensā b tāabā manegre, la a sunga ne dīinā manegre, yē sā n manege, zags a yiibā manegr bee ne rēnda, dūni la laahrā, rēnd a yeelame: (M Soab a Wēnde maneg m dīinā n kō-ma) Rat n yeele: maan-m sabab sōngo ti m yals ne zug sōngā ne neng sēn maneg n yuda. (Sēn yaa mam yellā gūudmā) La yē n gūusd mam yelā fāa gilli, rēnd mam dīinā sā n sāame, m bōn yā, rat n wilgame ti dīinā yell ka maneg wala b sēn ratā, rēndame ti dūni wā yell n manege, t'a yeele: (La F maneg m dūni wā n kō-ma) ne Fo sēn na n kō maam laaft m yīngē wā la bas-m-yam, la ritla, la pug-sōngo, la koamb sēn yaa sōma, la mam sēn tar tulsem fāa, ti yi halaale, n sōngd maam ti m tū Fo, rē poorē t'a togs padanga a sēn kot dūnu wā manegrā sababā, n yeele: (Sēn yaa mam vumā sēn be a pugē wā) Mam vumā zīig la a wakatā. (La F maneg m laahrā n kō-ma, sēn yaa mam lebengā sēn togdē wā) La mam lebgrā n tug Fo yekrā la rēnda yaa sēn tū ne tuumā manegre, la Wēnd segl sōngā ne A yembsā zugu la pu-peelem maanego, la baas neere. La Nabiyaamā (Wēnd puusg la A tigr be a yīnga) tūnuga taaba n yeel laahrā, dūni wā poorē; bala rēnem soabā, yē yaa radg sēn na n tū n maneg yiib soabā, rēnd ned ning sēn tēega turga a dūni wā yellē, wala Wēnd sēn ratā, a laahrā na n tēega turga, t'a paam zu-noog a pugē. (La F maan vumā) la yōorā woglem (ti yaa paasg ne-ma sōma fāa pugē,) ti mam wusg a pugē tuum sōmse, (la F maan kūumā) la a yāgbā (ti yaa vuusg ne maam n yi wēng buudā fāa) la fitna (zarb-n-gesga) la masuba, la zarbgo, la Wēnd kusgo la yam yaal-yaale, la fāagre n yi dūni wā yelā, la laaft la vuusg paoongo.

النجاة الخيرية
ALNAJAT CHARITY

